

Ny Valosoa sy hadihady

Raharaham-pirenena

Fantaro ireo fifidianana niteraka krizy teto Madagasikara

Raha itodihana ny fifidianana rehetra taorian'ny namerenana ny fahaleovantenan'i Madagasikara dia nisy ireo niteraka krizy, taorian'ny fandatsaham-bato (crise poste électorale). Vitsy ireo firenena tsy nahitana ity krizy aorian'ny fifidianana ity maneran-tany, satria nisy izany tany Etazonia izay azo lazaina fa anjakan'ny demokrasia. Iray ihany ny fifidianana tena niteraka krizy taorian'ny namoahan'ny Fitsarana Avo momba ny Lalàmpanorenana (HCC) ny vokatry dia ny tamin'ny taona 2002. Iaraha-mahatsiaro fa naindran'ny Amiraly Ratsiraka tany Mantasoa ny Fitsarana Avo momba ny Lalàmpanorenana ary tany ity andrim-panjakana ity no namoaka ny didy nanambary, fa ny Amiraly Ratsiraka Didier no lany. Tsy nanaiky izany ny mpomba an-dRavalomanana Marc, ka nitokona teo amin'ny Kianjan'ny 13 Mey efa ho enim-bolana, ka nisy ny fihaonan'izy mirahalaha tany Dakar, Senegal. Efa nisy ihany koa ny fiananana nataon-dRavalomanana Marc, satria fihodinana voalohany izy dia lany araka ny vokatry avy tamin'ireo fitanana an-tsoratra (PV) teo am-pelatanany. Niaraha-niaina ny fanambarana ny Faritany mizaka tena, ka nisian'ny fairano ny faritanin' Antananarivo, nametrahan'ny mpomba an-dRatsiraka Didier barazy tany amin'ny tetezan' i Kamoro sy Brickaville ary nanapahana ny tetezan'i Fatihita. Mbola napaoka ihany koa ny tetezana tetsy Ambalavao. Araka ny filazan'ny mpomba ny Revolisiona Demokratika dia tokony ho nisy ny fihodinana faharoa, hono, raha ny fanapahankevitra tany Dakar kanefa tsy nisy izany, ka dia nanao fiananana fanindroany tamin'ny fomba ofisialy ny filoha Ravalomanana Marc. Nanao sesitany ny tenany tany Lafrantsa ny Amiraly Ratsiraka Didier. Na dia roa taona aza no voafaritry ny Tondro Zotra nataon'ny Sadc naharetan'ny Tetezamita dia nitarin-dRajoelina Andry ho dimy taona izany. Fifidianana ny taona 2014 no niakaran'ny filoha teo aloha Rajaonarimampianina Hery kandida natolotr'i Rajoelina Andry, satria tsy nahazo nilatsaka noho ny "ni, ni" izy sy ny Filoha Ravalomanana Marc. Ny taona 2018 no nifarana ny fitondrana Rajaonarimampianina Hery, ka nisian'ny fifidianana faharoa tao anatin'ny Repoblika IV. Enina ambitelopolo no isan'ny kandida tamin'izany fifidianana izany, ka anisan'izany Ravalomanana Marc sy Rajaonarimampianina Hery ary Rajoelina Andry. Tsy hadino fa nisy ny fihodinana faharoa, ka Ravalomanana Marc sy Rajoelina Andry, no nifaninana tamin'izany. Samy nanana ny vinany ny mpifaninana, ka naverin'ny Filoha Ravalomanana Marc ny MAP izay vinany efa nentiny nampanandroso ny Nosy tamin'ny Repoblika III-3, nahatratra fito faingo roa isan-jato ny harin-karena faobe ny taona 2008. Ny IEM no naroson'ny filoha Rajoelina Andry. Nampivavaka ny fifidianana ny taona

2018 dia ny fahabetsahan'ny kandida nirotsaka izay nahatratra enina ambiefapolo ary folo no nihintsana tamin'ny fihodinana voalohany. Maro no tsy fahatombanana teo amin'ny fandrafetana ny lisitry ny mpifidy satria nisy olona iray trano kanefa tsy tao anaty lisitra daholo ary nisy diso koa ny anarana na dia voasoratra aza. Efa nananika ny roanjato ny fitarainana tao amin'ny HCC kanefa ny valiitenin'ity Fitsarana ity dia "azo raisina fa tsy mitombona". Ambonin'izay dia nanadio tena ny filohan'ny HCC, fa nialana tamin'ny korontana nety niseho no namoahany "didy nanana endrika politika", izay nametraka an-dRajoelina Andry eo amin'ny toeran'ny filohan'ny Repoblika. Ny tena zava-doza dia ny namakian'ny filoha lefitry ny Ceni teo aloha, fa nisy roa hetsy sy iray tapitrisa ny "doublons", izay tsy mbola nisy toe-javatra toy izany hatramin'ny namerenan'ny mpanjanaka ny fahaleovantena. Iaraha-mahalala fa niova ny mpikambana ao amin'ity Vaomiera Mahaleotena misahana ny Fifidianana ity, saingy tsy misy matoky azy na ny antoko politika na ny fiarahamonim-pirenena, eny hatramin'ny vondrona iraisam-pirenena aza. Ny zava-doza dia navaozina ny lisitry ny mpifidy, izay tokony nahatratra ho telo ambini-folo tapitrisa, ary ny nanaovana kopia sy karapanondrom-pirenena faobe ihany koa. Ireo no antony anaovan'ny mpisehatra rehetra amin'ny fifidianana fanentanana tsy an-kiato ny olompirenenana manana zo hifidy hanamarina raha voasoratra ao anaty lisitra ny anarany ary hanamarika raha misy olona efa maty na nifindra fonenana kanefa mbola voasoratra. Tsy azo amavianina ihany koa ny fandraisana andraikitra ny FFKM hanaramaso any ifotony mihitsy ny mety hisian'ny hosoka sy ny lesola rehetra, mba hialàna indrindra indrindra amin'ny krizy aorian'ny fifidianana. Anisan'ny mampivavaka ny fanomanana ity fifidianana 2023 ity ihany koa ny fitakiana ny hanovana ny mpikambana ao amin'ny Ceni sy ny HCC izay tsara marihina fa olon'ny fitondrana avokoa no mandrafitra azy ireo, ka hisy indray ny fikafika rehetra. Azo antoka fa tsy hanaiky lembehana intsony ny kandida rehetra raha hamoaka didy tsy mifanaraka amin'ny fahamarinana ny Fitsarana Avo momba ny Lalàmpanorenana dia tsy ho azo idovirana ny korontana aorian'ny fifidianana, koa aleo mitady ny fomba rehetra hialàna amin'izany dieny mbola misy ny fotoana satria raha ny tranga rehetra dia mahavaivay ny fifanoherana na eo anivon'ny samy ao amin'ny fitondrana aza ary efa tsy mifampatoky ka mifanebaka am-pahibemaso, etsy an-kilany kosa dia mihamafy ny tsindry ataon'ny mpanohitra. Ny hery anefa tsy mahaleo ny fanahy" ary "ny hendry mody voky fa ny adala manesika ihany".

Andry Tsiavalona

Antoko AREMA 47 taona

Tsy mendrika ny firenena sy ny vahaoaka ny zava-misy ankehitriny

Natao tsetsy amin'ny sehatra maitso Antsahamanitra ny alahady 19 Martsa teo, ny fankalazana ny faha-47 taonan'ny antoko Arema, na ny Antoko Revolisionera Malagasy. Tonga teny an-toerana avokoa ireo mpikatroka Arema tranainy sy ireo mpiara-miasa akaiky tamin'ny filoha Didier Ratsiraka. Na dia azo lazaina ho antoko tranainy aza ny Arema dia mbola tafiditra ao anatin'ny antoko 6 matanjaka indrindra amin'izao fotoana izao. Tsy nisy fitondrana nandalo teto, ka tsy niara-niasa tamin'ireo olona novolavoalain'ny Arema. Antoko nandalo vanim-potoana ihany koa satria nionandra ny firenena nandritra ny 23 taona, izay fitondrana naharitra ela indrindra teto hatramin'izao. Indroa voangana ary indroa tafaverina ihany koa. Ny taona 2002, no nifaranan'ny fitondrana Arema ary niaranan'ny sesitany ireo mpitarika, ka isan'izany ny filoha Didier Ratsiraka sy ny fianakaviany.

Nadritra ny fandraisam-pitenenana nataon'ny sekretera nasionalin'ny antoko, Ramatoa Anick Ratsiraka no nilazany, fa tsy mendrika ny firenena sy ny vahaoaka malagasy ny zava-misy ankehitriny. Anjaran'ny firenena no mamelona ny vahaoaka ao aminy hoy izy. Manana tany manankarena isika kanefa mahantra. Tany amin'ny fotoan'ny Boky Mena no efa nilazan'ny filoha izay nanoratra izany, ny tokony hananan'i Madagasikara fahaleovantena ara-tsakafo, sy ny tokony hanana ambim-bava azo aondrana any ivelany. Manana tany malalaka rahateo isika ahafahana manatanteraka izany.

Eo amin'ny lafiny politika indray, nanao antso avo amin'ny mpanao politika izy, ka niantso ny tsy tokony hanaovana sorona sy fitaovana ny vahaoaka intsony. Hikarakara ny vahaoaka sy ny tanindrazana, no andraikitra noraisin'ny mpanao politikaka, izay no tokony himasoan'ny rehetra dia handroso haingana ny firenena. Tsy tokony hanary toky isika hoy ramatoa Anick Ratsiraka, fa ho afaka ao anatin'ny fahantrana tsy ho ela i Madagasikara.

Nafana ny lanonana tetsy Antsahamanitra, izay nafa-nain'ireo mpanakanto zanaky ny Arema, isan'izany ry Rakotofrah Junior sy ry Jarifa, nandray anjara ihany koa ireo fikambanana ao anatin'ny antoko, isan'izany ny fikambanam-behivavy avy amin'ny boriboritan'ny faha-5, teo ireo mpikatroka avy any Moramanga sy Mananara, izay samy nanao fampisehaoana avokoa. Nofaranana tamin'ny fizarana mofo mamy ny lanonana.

Niaina



Ny fankalazana ny faha-47 taonan'ny antoko Arema, tetsy Antsahamanitra.

ANTOKO TIM MANJAKANDRIANA

Miantso ny filoha Ravalomanana hirotsaka fidiana filoha indray

Tontosa soa amantsara tany Andriampamaky ny sabotsy teo, ny fifampiarahabana nahatratra ny taona vaovao, sy fanentanana ny vahaoaka feno taona hisoratra anarana ao anaty lisi-pifidianana, tao amin'ny distrikan'i Manjakandriana tapany avaratra, amin'ny faritra Analamanga. Tonga maro ireo mpikatroka avy amin'ny antoko, avy amin'ny kaominina 10 any amin'ity distrika ity. Niditra mivantana tamin'ny alalan'ny antso an-tariby nandritra izany ny filoha Marc Ravalomanana, izay nanantitra fa taonan'ny fahasahiana ity taona, taom-pifidianana, mbola nanentana ny rehetra izy noho izany hisoratra anarana



Ny filohan'ny DISTIM Manjakandriana (tafovoany), sy ireo solontenan'ny Tanora TIM Analamanga, tany Andriampamaky ny sabotsy teo.

amin'ny lisi-pifidianana, ireo izay mbola tsy nahatontosa izany. Nitarika ny fotoana ny DISTIM Manjakandriana, notarihan'ny filohany Randriamanga

William Henri, ireo Jeunes TIM avy eto Analamanga sy Manjakandriana Randriamanga Jean Bosco sy ny namany,... Niantso ny filoha Marc Ravaloma-

nana nandritra izany, ny filohan'ny DISTIM Manjakandriana Randriamanga William Henri, ny hirotsahany hofidiana amin'ny fifidianana filohampirenena hatao eto amintsika amin'ity taona ity. Ny solontenan'ny TIM Analamanga, Randriamparany Jean Bosco dia nanipika, fa hanohy ny fanentanana ny mponina hisoratra anarana amin'ny lisitry ny mpifidy ny tanora, toy ny efa nataony tamin'ny herinandro teo, sy nandritra ny andro maromaro lasa izay. Ny masoandro nilentika no nampalahelo, nandritra izao fihanonana teo amin'ny antoko TIM Manjakandriana tapany avaratra izao.

Isambilo

TOMONKALO

Fidedahana sy lainga ?

Fidedahana ? aoka re fa lohany izy !
Miaiky izany hatramin'ny zaza sy ny ankizy.
Hita taratra amin'ny teny fanentanany,
Fa ny lainga dia talenta tena ananany !
Ny haniika ny rihitra amin'ny hafa,
Izany hatrany no fanaony raha mitafa,
Ary ambarany amin'ireo vahoaka entina,
F'izy olona madio tsy misy pentina.
Saingy indrisy, tsy izany velively,
Fa ny toetrany dia tena tsy modely.
Toy izany koa ny ataony raha tarafina,
Mahonena sady maha-te hiafina !
Ny "joroana" maha-tena olo-mendrika,
Dia tsy ananany ara-toetra sy arak'endrika,
Fa ankosotra sy zavatra natentina,
Ka tsy miery fa miseho ny pentimpentina!
...Fidedahana sy lainga mipopoaka ?
Izay hatrany raha vao mba miseho vahoaka ?
Miomàna , miomàna ry filoha
Fa tena ianao no "hipipy am-pataloha" !
IRINA HO TAFITA (18-03-23)